

Date – 26/05/2025
Time - 7:30 -7:40Hrs
AKASHVANI AIZAWL

HEADLINES (MORNING)

1. Khawvel ram thenkhatah leh ram chhung hmun thenkhata Covid-19 hri a len thar leh avangin a tul anga hmachhawn turin sorkarin ngaihtuahna an seng mek.
2. Lawngtlai kaltlanga Myanmar rama Chin state leh Rakhine state a bungraw phurhluh khap chu kar kal ta Thawhlejni zan atang khan zawm chhunzawm a ni lo.
3. Rising North East Investors Summit 2025neih zawh takah sum peipun tur cheng vaibelchhe nuai 4 chuang hmuh a ni
4. India chu khawvela economy lian ram palinaah a inhlangkai.

<><><>

COVID-19

Khawvel ram thenkhatah leh ram chhung hmun thenkhata Covid-19 hri a len thar leh avangin health department hnuai integrated disease surveillance programme (ISDP) hotute chuan a tul anga hmachhawn turin ngaihtuahna an seng mek.

Mizorama IDSP nodal officer Dr. Vanlalrengpuia Chinzah hnen atanga thudawn danin tunah hian ramdang leh ramchhunga Covid-19 hri leng thar leh hi ngun taka zir chian reng a nih bakah sorkar laipui atang pawhin chanchin dawn reng a ni a. Chuti chung chuan engtin nge kalpui dan tur tih erawh chu thurawn an la dawng lova. A mamawh dan azirin hrileng a lo thlen ve thulha chetlak dan turah ngaihtuahna an seng reng niin a sawi. Dr. Vanlalrengpuia Chinzah chuan thil awmdan a zirin Covid-19 hrilenna ram leh state atanga Mizorama lo lut turte thlawhna tumhmun emaw hmun hrang hranga lo endik a lo thliar thleng pawhin ruahmanna siam thei turin an inralring niin a sawi.

Kum 2020 atanga 2023 bul lam thlenga Mizorama Covid-19 hri leng avang khan mi 734 an thi a. Kum 2021 a Delta variant a lo chhuah kha thi an tam ber a, mi 538 zet kum khat chhungin an thi a. Kum 2022 khan mi 180 an thi a, hri a len tan kum 2020 leh a reh kum 2023 kumte khan mi 8 ve ve an thi a ni. Covid-19 vei leh vei lo hre turin sample nuai 20 dawn lak a ni a, chumi zingah chuan nuai 2, sing 3 leh sang 9 chuang chuan he hri hi an kai tih hmuhchhuah a ni a. Hri kai dam leh hi mi 2,38,901 an ni a, chu chu za zela 99 point 68 a nih lai-in thi zat hi za zela bial point pathum a ni thung a ni.

<><><>

CM-NITI AAYOG

NITI Aayog Governing Council vawi 10 inkhawmah chief minister Pu Lalduhoma chuan Thenzawl a khawpui din a duh thu a sawi.

Prime Minister Pu Narendra Modi kaihhruai a Delhi-a Inrinni a NITI Aayog thuneitute thutkhawmnaah he thu hi sawiin Pu Lalduhoma chuan Mizoram mipui zatve ai a tam khawpui ah an cheng ni a sawiin khawpui a cheng zaa sawmriat chu Aizawlah an cheng mek a ni a ti a. Hemi avang hian Aizawl khawpui a tawt em em mai a. Mizoram thalaite hi huan lo ram neih leh thil siamchhuahna lama tam zawka an luhna tur dap a ngai a. He mi kawnga Mizoram mutan kheng thla turin khawpui thar, mipui nuai sawm atanga nuai sawmpanga vel khawsakna tur Thenzawl-Peace City din a duh thu a sawi a. He mi tipuitling tura Ministry of Housing & Urban Affairs an thlawp that avangin lawmthu a sawi a ni.

Chief minister chuan tun hnai lawkah Mizoram chu a mi chengte ziaak leh chhiar thiam vek tawha puan a nih thu a sawi a. Hei hian Mizoram chu chhawr tlak mihring (human capital) lama a inbuatsaih nasatzia leh a hlawkpuzia a tilang a ni a ti a. Hna hmu lo chu za zela 2 point 2 chauh ni a sawiin, hnathawk zingah hmeichhiate chu za zela 45 lai an nih thu a sawi a. Thiam thil lamah pawh Mizoram chu a duai lo hle a, khawvel huap inelnaah India aiawh thei khawpa tha an awm niin a sawi.

Kum 2047 a khawvel ram hmasawn berte zinga tel tura inbuatsaihna Viksit Bharat 2047 a hlawhtlin theihna atan NITI Aayog State Support Missions kaltlangin Mizoram chuan chak takin hma a la niin Pu Lalduhoma chuan a sawi a. Department tin ruahmanna (action plan) thehluhtir an ni a, an ruahmanna siam theuh behchhan hian Mizoram hmathlir (Vision Document) buatsaih mek a nih thu leh rei loteah NITI Aayog a thehluh a nih tur thu a sawi a. Viksit Bharat 2047 atana Mizoram sorkar hmalakna langsar tak chu Bana Kaih ruahmanna a ni, a ti a. Ram hmasawna atana thawhpuitlak (progress partner) te chu cheng nuai 50 thleng puktir theih an ni dawn a, an thawh that dan a zirin a pung awm lova pek an nih tur thu a sawi a. Tunah hian chutiang thawhpui chu a thawh khat nan mi 517 thlan fel an nih tawh thu a sawi a. Sorkar laipui ruahmannate nena kaldun zel tura duan a ni, a ti.



SCHOLARSHIP

Mizo Students' Union (MSU) hruaitute chuan Mizorama tlawha lo zin Union Minister of State for Minority Affairs Pu George Kurian chu tribal scholarship pek chhuah loh chungchang an sawipui.

MSU hruaitute hian Pu George Kurian-a hi Aizawl BJP pisa-ah an hmu a. Tribal Scholarship 2024, Installment palina, cheng nuai 870 tun thlenga central sorkarin in pawisa a la pekloh vanga zirlaite'n an la dawn theih loh chungchang an thlen a. Scholarship an dawn tlai thin avanga harsatna hrang hrang zirlaite'n an tawh te sawiin, hmalakpui turin ziaakin an ngen a ni.

MSU hian Mizoramin online exam center a neih that loh avanga CUET leh UGC-NET exam bakah online exam hrang hrang state pawna exam a ngaih thin avangin harsatna an tawh thin thu an thlen bawk a. Mizoram State in online exam

center lian tha tak leh changtlung tak a neih theih na'na hmalakpui turin an ngen bawk.

Union Minister of State for Minority Affairs chuan MSU hruaitute thil thlen chu a ngaih pawimawh thu leh theihtawp a chhuahpui tur thu a lo sawi a ni.

<><><>

BORDER TRADE

Lawngtlai kaltlanga Myanmar rama Chin state leh Rakhine state a bungraw phurhluh khap chu kar kal ta Thawhlejni zan atang khan zawm chhunzawm a ni lo.

Lai autonomous district council (LADC)-a senior revenue & settlement officer Pu A. Zaithanga chuan a hma a Lawngtlai district bawrhsap Pu Cheemala Siva Gopal Reddy hova district civil defence force thutlukna lo siam tawh angin India leh Pakistan ram inepna boruak avangin Lawngtlai district a chengte'n nitin eichawp thil an tlakchham lohna turin May ni 16 khan Myanmar lama mipui nitin mamawh ang chi thawnluh khapna thupek a chhuah a. Myanmar lama bungraw thawn phalna 'trade licence' neite chu bungrua an thawn lui a nih chuan an licence tihtawpsak thleng a hrem theih an nih tur thu hriattirna chhuahah hian tarlan a ni. Mahse, ramri tawn tawna chengte inhriatthiamna hmangin kar kalta Thawhlejni zan atang khan insumdawn tawna hi chhunzawm leh a nih thu ramri a awmte chuan an sawi a. Bungraw chi hrang hrang hi Chin state chhimlam Paletwa khua kaltlangin Rakhine state lama phurh luh zui leh mek a nih thu thudawna chuan a sawi a ni.

Mizoram chhim lama ramri-a insumdawn tawna-ah hian tuialhthei, hriak (tel), chhang, hmarcha, rangva, battery, solar panel, furniture te leh eichawp chi hrang hrangte Myanmar lamah an chaw lut a. Lawngtlai a kan Corr sawi danin Lawngtlai district-ah hian Hruitezawl kaltlangin Myanmar lamah bungraw thawn a ni ber a, Siaha district-ah chuan Lungpuk khaw kaltlanga phurhluh a ni deuh ber thung a ni.

Paletwa khua hi Kaladan Multi Modal Transit Transport Project kawngpui siam mek pal tlang, Chin state chhim lama awm a ni chungin Rakhine state hel pawl Arakan Army hian an awp mek a. He khua hi Mizoram atanga Rakhine state-a bungraw chawk luh phurh tlangna kawng ber pakhat a ni.

<><><>

MANN KI BAAT

Mizoramah Fisheries, Animal Husbandry and Dairying and Minority Affairs changtu Union Minister of State Pu George Kurian hovin State BJP Office Atal Bhawan Aizawl-ah Prime Minister Narendra Modi-a'n thlatin ram mipuite hnena thuchah a sawi thin, 'Mann ki Baat' tum 122-na nimin khan an ngaithla a. Prime Minister Narendra Modi kaihuai sorkar chuan ram tan theihtawp a chhuah reng a, Mizorama hmasawna hna hrang hrang thawh mekte pawh tha taka thawh a nih a, hlawhtlinna hmuh ngei a beisei thu leh Mizoram mipuite chu nakin zela thangthar lo la awm zel turte tan ram hmasawna tluantling a neih theih nan tanrual a ngaihthu union minister hian a sawi a.

Nimina 'Mann ki Baat' ngaihthlak hona-ah hian Mizoram State BJP President Vanlalhmuaaka leh Siaha bialtu MLA Dr. K Beichhua bakah Lai Autonomous District council CEM, Pu N Zangura leh Advisor to CEM Pu BN Thangpuia te an tel a ni.

Mann ki Bhaat chu nimin khan Chawngte-ah a huhovin ngaithlak a ni bawka, BJP Chakma Autonomous District Council huaihawtin Prime Minister thusawi hi Kamalanagar-IV a Bazaar Shed ah mipui ten a huhovin an ngaithla a, Chawngte khawchhung bakah a chhehvel khua atangte pawn Prime Minister thusawi ngaithla tur hian an kalkhawm a, Chawngte ah hian Maan Ki Bhat hi a hma pawhin huhovin an lo ngaithla tawh thin.

Pu Durjya Dhan Chakma President BJP, CADC chuan Prime Minister thusawi ngaithla tura pungkhawmte hnenah lawmthu sawiin, BJP Sorkar chuan hmasawmna nasa tak a thlen mek a ti a, hnam hnufual zawk tan paw'n Prime Minister hmalakna chu inngahna tlak a ni tih sawiin, India ram hmathlir hlawhtlinna thlen tur chuan Prime Minister Narendra Modi leh a kaihhruai BJP Sorkar chu an tling tawka a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

INDIAN ECONOMY

India chu khawvela economy lian ram palinaah a inhlankai. NITI Ayog CEO B.V.R Subrahmanyam sawidanin tunah chuan India eibar dinhmun economy hlut zawng chu IMF chhut danin dollar tluklehdingawn sang 4 chuang a ni tawh a ti a. India chungah hian United States, China leh Germany te an la awm a ni a ti.

IMF chuan India chu economy thang chak ber a ni chhunzawm dawn tih a sawi bawka a ni.

<><><>

RISING NORTH EAST

Rising North East Investors Summit 2025neih zawh takah sum peipun tur cheng vaibelchhe nuai 4 chuang hmuh a ni. Khawvel ram 80 chuang atangin he Summit ah hian palai an lo kal a. Japan atanga Europe ram leh ASEAN ramte atangin ni hnih awh Summit ah hian palai an lo kal a ni.

Kharna inkhawmah Union Minister for Development of North Eastern Region Jyotiraditya M.Scindia chuan hmarchhak-a theihna tam tak awmte hmuchiangtu Prime Minister Narendra Modia fakawm atih thu a sawi a. Pu Scindia chuan

hmarchhak chu khawvel sumdawna kawngah ramdang tana thawhpui tha tak a ni chho mek a ti a. India economy hmunpui ni turin hmarchhak chu a indin chho mek a ni a ti bawk.



DELEGATES

Firfiaka chetna leh Operation Sindoor-a India ngaihndan puang tura tirh Congress MP Shashi Tharoor-a kaihhruai palaite chuan nimin khan Guyana an thleng. Cheddi Jagan International Airport-ah India palaite hi lo lawm an ni a. An cham chhungin Firfiakte laka India dinna chungchang Guyana hotute an sawipui dawn a ni.

NCP (SCP) MP Supriya Sule kaihhruaite chuan nimin khan Qatar chanchinbu pahnih Al Sharq and Peninsula. editorial team te nen inkawmna hun an hmang. BJP MP Bajjayant Jay Panda-a kaihhruai team te chuan vawiin hian Kuwait an pan bawk ang.

